

春秋左傳補注

春秋左傳補注卷第二

宣元年傳會於棐林至遇於北林 酈元曰華水又東

逕棐城北卽北林亭也服虔曰北林鄭南地京相璠
曰今滎陽苑陵縣有故林鄉在新鄭北故曰北林余
案林鄉故城在新鄭東如北七十許里苑陵故城在
東南五十許里不得新鄭北也考京服之說竝爲疎
矣杜預曰滎陽中牟縣西南有林亭在鄭北今是亭
南去新鄭縣故城四十許里蓋以南有林鄉亭故杜
預據是爲北林最爲密矣

二年經戰於大棘 酈元曰澠水又東逕大棘城南故
鄆之大棘鄉後其地爲楚莊所并故圈稱曰大棘楚

地澗水又東逕安平縣故城北陳畱風俗傳曰大棘鄉故安平縣也郡國志陳畱已吾有大棘鄉姚薑塢先生曰魏志文紀黃初四年三月甲午行幸襄邑已吾與襄邑接境已吾爲魏武起兵之地但言襄邑而不言已吾豈是時已併省乎璉案胡身之通鑑注已吾魏晉時省元和郡縣志已吾故城在寧陵縣西南四十里是已吾之地魏晉時已省入別縣而大棘則省入襄邑杜注甚精

傳其御羊斟 史記宋微子世家淮南子作羊羹燕策

厨人進斟羹方言云斟汁也北燕朝鮮澗水之閉曰

斟關西曰汁

元案淮南繆稱訓羊羹不斟而宋國危

觸槐而死 韋昭晉語注槐爲晉外朝之樹案晉語范
獻子執董叔紡於庭之槐是槐爲三公之位故晉卿
執人於此足證槐爲外朝之樹矣惠定宇以三槐釋
此甚確

遂扶以下 扶服注作跣文選東都賦注引薛君韓詩
章句曰飲酒之禮下跣而上坐者謂之寔是盾侍寔
跣而上堂知有變故跣而下釋文引服注云徒跣也
今杜注本往往有跣者是陸氏亦以服注爲精邃矣
公噉夫葵焉 方言云秦晉冀隴謂使犬曰噉釋文引
尚書傳曰葵大犬也爾疋云狗四尺曰葵王先生念
孫曰凡物之高大者皆謂之敖山高者爲敖山犬

高大者爲獒犬說文獒犬知人心可使者凡犬皆知
人心豈獨獒邪璉案爾疋郭注引尙書孔氏傳曰犬
高四尺曰獒公羊傳何休注云犬四尺曰獒與爾疋
同又案馬融尙書族獒注獒作豪是獒有猛意杜注
本馬尙書注

舍於翳桑 疑首山近地杜注爲桑下意本史記王引
之曰翳桑首陽近地此說是也杜注翳桑翳桑多蔭
翳者公羊傳云子某時所食活我於暴桑下者也何
注暴桑蒲蘇桑引案左氏公羊氏傳聞各異公羊氏
云暴桑下謂桑樹下也故呂氏春秋報更篇昔趙孟
將上之絳見骹桑之下有餓人淮南人閒訓趙宣孟

活飢人於委桑之下皆用公羊說也其左氏云舍於翳桑又云翳桑之餓人也皆但言翳桑不言翳桑下則翳桑似是地名知者僖二十二年左傳之謀於桑下以此例之倘是翳桑樹下則當云舍於翳桑下且當云翳桑下之餓人今此是地名故不言下也春秋時地名或取諸草木若宣二年經戰於大棘僖二十四年傳晉師軍於廬柳哀八年傳吳師克東陽而進舍於五梧又僖八年晉里克帥師以敗狄於采桑昭二十九年遂濟窮桑史記秦本紀張儀與齊楚大臣會齧桑皆地名也乃史記晉世家云初盾嘗田首山見桑下有餓人又云盾問其故曰我桑下餓人用左

氏文而改翳桑爲桑下則已誤以公羊之說爲左氏之說矣杜氏之誤亦與史記同

宦三年矣 戴記曲禮宦學事師鄭注宦仕也正義引熊氏云宦謂學仕宦之

三年傳鑄鼎象物 呂覽先識覽篇云周鼎著饜養有首無身食人未嚙害及其身

成王定鼎於郊廓 說文云廓河南縣直城門宮陌道

也

元案續漢書郡國志河南劉昭補注引帝王世紀曰城西有郊廓陌

四年傳謂虎於菟 王引之曰於菟虎文貌說文餘黃牛虎文讀若塗菟餘聲義竝同虎有文謂之於菟故牛有虎文謂之餘於菟云者言其文之於菟然也說

文虎虎文也於菟與虎聲近而義同單言之謂之虎
重言之謂之於菟

六年傳以盈其貫 爾疋釋詁貫事也謂盈滿其疾民
之事

十年傳飲酒於夏氏 王符曰夏氏陳公族

取繹 此非邾文公所遷之繹杜注非

元案正義曰文
十三年傳稱邾

遷於繹則繹爲邾之都矣更別有
繹邑今魯仍取之非取邾之都也

十一年傳諸侯縣公 高誘曰楚僭稱王守邑大夫皆

稱公若周之單襄公成肅公劉文公也

牽牛以蹊人之田 劉熙釋名云步所用道曰蹊

十二年經戰於邲 說文云邲晉邑春秋傳曰晉楚戰

於邲

元案春秋傳晉楚戰於邲八字據繫傳是徐錯說非叔重原文又案水經注濟水又東逕敖山

北濟水於此又兼邲目春秋宣公十三年晉楚之戰楚軍於邲卽是水也音下願棟高大事表云今開封

府鄭州東六里有邲城杜注鄭地較許爲精

傳卜臨於大宮 易人謀鬼謀儀禮疏引鄭注謂謀卜

筮於廟門是古人卜筮必於祖廟鄭祖厲王此祖廟蓋厲王廟

守陴者皆哭 墨子備城門篇云三十步置坐候樓樓

出於堞四尺又云俾倪廣三尺高二尺五寸說文云

陴城上女牆俾倪也嶽經音義引三倉云俾倪城小

垣也墨子又云守法五十步丈夫十八丁女廿八老

小十人計之五十步四十八

至於達路 劉熙釋名云九達曰達齊魯謂道多爲達

軍行右轅至後勁 此楚之軍政名

賤有等威 如條臣僕僕臣臺之類

沈尹 墨子所染篇云楚莊染於孫叔沈尹淮南叔敖
將死謂其子請寢邱之地高誘注云寢邱今汝南固
始地元和郡縣志云沈邱本漢寢縣地沈尹作寢尹
爲善

車路藍縷 服虔云言其縷破藍藍然正義引方言衣

敝誤作衣破服注縷破依方言宜改縷敝方言又云

南楚凡人貧衣被醜敝或謂之襍縷以布而無緣敝

而紘之謂之襍縷

元案疏引方言衣
敝是衣被之誤

以至於昏 文選注引五經要義昏闇也日入後漏三刻爲昏

以致晉師 周禮環人掌致師鄭注古者將戰先使勇力之士犯敵焉

獸人無乃不給於鮮 戴記月令天子乃鮮羔鄭注云鮮當爲獻聲之誤也不給於鮮當解爲不給於獻

帥七覆於敖前 鄭元曰礫石谿水出滎陽城西南李澤東北流歷敖山南春秋晉楚之戰設伏於敖前謂是也

脫扃 鄭康成考工記注云戈及戟矛皆插車輪貫疏云車輪外設扃戈及戟矛所建說文云輪車旁也貫

疏以扇在轎外服注以爲車前橫木是也薛綜西京

賦注云扇所以止旗纛文扇車上兵闌也

元案考工記鄭注戈

戈戟矛皆插車輪貫疏云當皆以鐵圍範邪置於輪之上下乃插而建之不言設扇也輪外設扇戈及戟矛所建是戴氏考工記圖約貫義夾注鄭注之下非冒六疏也

抽矢鼓

既夕禮御以諸鼓釋文牡蒲莖也

元案蒲莖也

注是鄭

射連尹襄老

屈蕩爲連尹服注云連尹射官言射相

連屬也

祀於河

水經河水又東逕卷縣北酈元曰楚莊祀河

告成而還卽是處也案衡雍在卷縣故酈元云祀於

河在卷縣北

而後喜可知也 呂覽自知篇云文侯不說知於顏色
高誘注知猶見也杜注本此

十四年傳衛人以爲成勞 戴記正義云左傳孔達無

相衛成公復國之事 禮案孔悝鼎銘云叔舅乃祖莊

叔左右成公成公乃命莊叔隨難於漢陽卽宮於宗

周奔走無射鄭注莊叔悝七世之祖衛大夫孔達也

隨難者謂成公爲晉文所伐出奔楚命莊叔從焉卽

宮於宗周後反得國坐殺弟叔武晉人執而歸之於

京師寘之深室也據鼎銘是孔達實有佐成公復國

之勞故衛人雖告其背盟之罪於諸侯而復使其子

得問叔毅爲卿杜注平國之功未詳佐成之事夫亢

大國之仇豈反以爲功乎

乃殺之 呂覽行論篇云殺文無畏於揚梁之隄

投袂而起 呂覽莊王方削袂聞之曰噫投袂而起孔

廣森曰削裁也投袂投其所削之袂也

元案淮南主術訓楚莊王

傷文無畏之死於宋也奮袂而越衣冠相連於道

十五年傳君其待之 時晉將圖赤狄故休其兵力而

不救宋託言楚強以止之觀伯宗之謀伐潞可證

鄧舒有三雋才 尚書鄭注才德過十人爲俊

敗赤狄於曲梁 杜注曲梁在廣平蓋浴晉侯弟亂行

於曲梁而誤彼曲梁在廣平有雞澤可證此曲梁近

潞不得遠引廣平之曲梁爲據劉昭案上黨記謂曲

梁在潞城西十里甚確又於魏郡曲梁復引左傳宣十五年敗赤狄於曲梁爲注是仍沿元凱之誤注無折衷者也惠定宇知援上黨記駁杜注之非而未詳杜注致誤之由因備釋之

獲杜回 外傳晉語曰克潞之役秦來圖敗晉功魏顛以其身卻退秦師於輔氏親止杜回其勳銘於景鐘十七年傳苗賁皇 宰相世系表云河南軹縣南有苗亭案郡國志河內有野王溫軹三縣軹有原鄉賁皇爲苗邑大夫時自軹縣往野王見晏桓子歸乃言於晉侯是自河內歸河東

成二年經盟於袁婁 張華博物記曰臨淄縣西有袁

婁

傳次於鞠居 劉昭郡國志補注云陳爾志對邱有鞠亭古鞠居

與先大夫之肅 先大夫指晉卻縠穀穀悅禮樂而敦詩書故曰先大夫之肅亭林說猶未備

師至於靡笄之下 史記索隱曰靡笄山名在濟南

桀石以投人 桓五年傳檜動而鼓賈逵注檜發石一曰飛石說文檜建大木置石其上發以追敵後漢堅鐔傳鐔每急輒先當矢石章懷注石謂發石以投人三國魏志太祖爲發石車擊袁紹此傳下言禽之而乘其車是高固先發石投人而後乘人之發石車也

元案乘人之發石車不如從杜注
釋已車而載所獲者車語較勝確

逢丑父與公易位 御覽引五經要義國君及元率戎
車將在中央當鼓御者在左勇力之士執戈在後丑
父易位蓋居中而使公爲御

鄭周父御佐車 鄭康成禮記注朝祀之副曰貳戎獵
之副曰佐

入於狄卒 漢志千乘郡狄縣後漢安帝改曰臨濟史
記正義曰故狄城在淄州高苑縣西北

必以蕭同叔子爲質 賈逵曰蕭附庸；姓當謂蕭宋
之附庸與宋同姓蕭叔大心卽蕭之先附庸蓋以叔
爲稱蕭叔朝公是也

物土之宜 鄭康成孝經注分別五土視其高下若高

田宜黍稷下田宜稻麥

用蜃炭 劉光伯云用蜃復用炭是乃天子之制故言
死又益其侈考工鄭司農注云蜃謂灰也

輿帥 周禮敘官夏官司馬之屬輿司馬上士八人此
輿帥疑卽輿司馬

盟於蜀 釋例博縣西北有蜀亭

三年經帥師圍棘 郡國志濟北地邱劉昭案杜注云
汶水北地有棘鄉與今本杜注異

傳鄭賈人有將置諸褚中以出 漢書南粵趙佗傳上
褚五十衣師古注云以綿裘衣曰褚

四年經冬城鄆 釋例以此爲西鄆非是此爲莒魯所
爭之東鄆郡國志瑯邪東莞有鄆亭璉案鄆近費故
爲季氏邑漢五行志成公五年秋大水董仲舒劉向
以爲時成幼弱政在大夫前此一年再用師明年復
城鄆以彊私家師古注鄆季氏邑是也

六年傳師於鉞 鉞疑作鹹郡國志東郡濮陽有鹹城
或曰古鹹國以下言師在其郊則惟鹹地近濮陽也
七年經同盟於馬陵 郡國志河東平陽劉昭案杜注
云馬陵衛地平陽東南地名馬陵又說在魏郡元城
今本杜注不言平陽衛地不至河東也劉昭一地兩
注無所適從遠遜元凱之精當矣

吳入州來 爾疋釋邱淮南有州黎邱郭注今在壽春
縣古來黎同音州黎卽州來也

九年經楚人入郟 郡國志瑯邪東莞有郟亭

傳公享之 儀禮燕禮鄭注云諸侯無事若卿大夫有
勤勞之功與羣臣燕飲以樂之禮也文子有如宋致
女之勤勞故用燕禮享之

十年傳子然盟於修澤 酈元曰修澤鄭地

傳南冠而縶者誰也 淮南主術訓曰楚文王好服獬
冠楚國效之高誘注獬廌之冠如今御史冠後漢輿
服志法冠或謂之獬豸冠胡廣說曰春秋左氏傳有
南冠而縶者則楚冠也

十一年經及卻犇盟 世本云卻豹生卻芮芮生缺缺
生克又云豹生義義生步揚步揚生州州卽犇也犇
與克俱豹之曾孫當爲從祖昆弟服注甚善杜本之
傳晉卻至與周爭鄆田 說文云鄆晉之溫地周賜晉
文溫田後爲卻氏私邑王符曰卻至食采於溫號曰
溫季周溫地未盡賜晉故與卻至爭鄆田杜預以鄆
爲溫之別邑不若叔重解字之精矣

十三年傳費滑 酈元曰緱氏縣治故滑費春秋滑國
所都也

虔劉我邊陲 尙書呂刑奪攘擄虔鄭注云擄虔謂撓
擾春秋傳虔劉我邊陲謂相奪人物以相撓擾也

我寡君是以有令狐之會 劉光伯以寡君爲使臣自稱已君之辭呂相雖奉君命兼有已語故稱寡君璉案自昔逮我先公至寡君不敢顧昏姻皆呂相使臣之辭自君有二心於狄至實圖利之乃呂相代晉厲公詰秦之辭故稱寡人

不更女父 劉劭爵制曰秦依古制其在軍賜爵爲等級其帥人皆更卒也有功賜爵則在軍吏之例自一爵以上至不更四等皆士也又曰不更者爲軍右不復與凡更卒同也續漢書百官志劉昭補注引之

成肅公卒於瑕 瑕卽解縣瑕城

鄭公子班自訾 訾疑卽鞏縣東訾聚雖爲周地近鄭

十五年傳出舍於睢上 御覽引九州要記曰睢陽水
在宋城西

十六年傳敗諸洧陂 水經泄水出博安縣北過芍陂
酈元曰芍陂在壽春縣南八十里御覽引壽春圖經
曰芍陂在安豐縣豫州記曰陳縣地有芍陂湖

有淖於前 呂忱字林曰濡甚曰淖

樂鍼見子重之旌 墨子旗幟篇曰建旗其署令皆明
自知之曰某子旗

不亦識乎 高誘呂覽注記識也

殺陽豎 淮南作豎陽殺高誘注豎小使也陽殺其名
養由基 酈元曰養水在郊縣南或謂之沙水下流入

汝郡國志潁川襄有養陰里京相璠曰或謂之沙城以養水而名也由基蓋以地爲氏高誘以養爲姓疑非

三肅使者而退 周禮九擯九曰肅拜鄭注肅拜但俯下手介者不拜故曰爲事故敢肅使者賈疏云軍中有此肅拜

楚師還及瑕 酈元曰瑕陂水東南逕瑕城南楚師還及瑕卽此城也璉案酈注瑕地在下邳淮陵縣境

大夫命側 周禮考工記車人行澤者反鞣行山者仄鞣鄭注故書反爲側反仄互通詩關雎輾轉反側正義云反側爲一是反卽仄也故子反名側

十七年經卒於狸脈 酈元曰狸脈魯地

傳聲伯夢涉洹 酈元曰洹水逕內黃縣北東流注於
白溝世謂之洹口聲伯夢涉洹卽是水也

公遊於匠麗氏 賈逵曰匠麗氏晉外嬖大夫在翼者
杜注未全本賈說與下葬翼東門外不貫

十八年傳使修士蒞之法 晉語皆祏對韓宣子曰昔
隰叔子違周難於晉國生子輿爲理以正於朝朝無
姦官爲司空以正於國國無敗績韋昭注子輿士蒞
之字右行辛晉大夫賈辛也

立軍尉以攝之 淮南兵畧訓云論除謹動靜時吏卒
辨兵甲治正行伍違什伯明鼓旗此尉之官也高誘

注軍尉所以尉鎮戢也

張老爲候奄 淮南兵畧訓云前後知險易見敵知難
易發斥不忘遺此候之官也高誘注軍候候望者也
王符曰河東解縣有張城張老或以邑爲氏邪

程鄭爲乘馬御 韋昭曰程鄭晉大夫荀謹之孫程季
之子杜注乘車公車也乘馬御蓋卽爲公御

襄元年傳侵宋呂留 水經泗水又東南過呂縣南郟
元曰呂宋邑也縣對泗水鄭康成發墨守云留在陳
宋之東

二年傳故晏弱城東陽以偪之 郡國志泰山南城有

東陽城

請息肩於晉 淮南汜論訓高誘注肩負擔之勤也

三年傳至於衡山 劉昭吳郡烏程補注云或云丹陽

縣之橫山去鳩茲不遠子重所至也山謙之丹陽記
曰丹陽縣東八十里有橫山連亘數十里或云楚子
重至於橫山是也顧亭林疑衡山在丹陽誠是劉昭
山謙之說可證

組甲三百被練三千 荀子議兵篇云楚人鮫革犀兕

以爲甲幹如金石又云宛鉅鐵鉞慘如蠶蠶輕利傑
邀卒如飄風疑卽組甲被練之類許慶宗曰管子四
時篇房注組甲謂以組貫也韓非子過秦得韓之都
而驅其鍊甲鍊甲卽被練也孟子有布縷之征趙岐

注縷紘鎧甲之縷也典臬賈疏縷用麻之物是凡甲皆以麻貫之此組以帛貫之尤爲精貴矣

乃盟於彤外 水經時水東至臨淄縣西屈南過太山華縣東鄭元曰時卽彤水也惠定宇據京相璠以澶水爲彤水璠案左傳敵如忘釋文引服注云如而也星隕而雨卽星隕如雨也京相璠以彤水卽地理志如水彤而聲相似是也孟子宿於晝史記注引劉熙注晝齊西南近邑京相璠謂臨淄唯有澶水西北入

濟

稱解狐 韓非子外儲說篇解狐薦其讎於簡子以爲相又云解狐舉邢伯柳爲上黨守

赤也可 大戴禮將軍文子篇祁奚曰其爲人之淵泉
也多聞而誕也太內辭足以沒世國家有道其言足
以生國家無道其默足以容蓋桐鞮伯華之行也
與之禮食 韋昭曰禮食公食大夫之禮禮記正義云
凡正饗食在廟晉悼以公食大夫禮而饗莊子於廟
因以爵祿告諸先君而策命之使佐新軍

四年傳季孫曰畧 孔安國論語集解曰簡畧也是畧
乃簡畧之謂故君子謂之多行無禮杜解太迂
昔周辛甲之爲太史也 劉向別錄云辛甲事紂七十
五諫而不聽去之周文王以爲公卿封之長子

臧紇救邾 臧氏世爲司寇司寇秋官也在國則主兵

賦如臧宣叔命修賦繕完及毀中軍成諸臧氏也出外亦爲軍帥如卻克伐齊臧宣叔爲道是也魯有大征伐則三卿並將三卿不出則專命司寇出征此魯之官制也

敗於狐駘 淮南墜形訓曰時泗沂出臺台術高誘注臺台術皆山名水經泗水出魯卞縣北山璉案鄭元注邾姑蔑城在下縣南是魯卞縣爲邾魯接境之地臧孫與邾戰敗於狐駘爲目台山卽魯卞縣北山也惠定宇援淮南溜出目駘證狐駘爲溜水所出之山案水經溜水出泰山萊蕪縣原山東北過臨淄縣東非邾魯接境惠說不如杜注之確

五年經會吳於善道 御覽引南兗州記盱眙本春秋

時善道

九年傳使西鉏吾庀府守 劉光伯以府守爲府庫守

臧

國君十五而生子 論衡率性篇若生子罔不在厥初

生生子謂十五

君冠必以裸享之禮行之 劉光伯云冠是大禮當徧

羣廟

次於陰口而還 酈元曰洧水又東逕陰阪北水有梁

焉俗謂是濟爲參辰口服虔曰水南曰陰口者水口

也參陰聲相近蓋傳呼之謬耳又晉居參之分實沈

之士鄭居大辰之野闕伯之地軍師所次故濟得其名也

十年經會吳於柎 釋例柎地缺或曰彭城傅陽縣西北有柎水溝魯國薛縣西南有柎亭譙國鄆縣治戲鄉皆去鍾離五百餘里非諸侯六日載會所至也或曰汝南安城縣西南有鍾離亭西平縣北有柎亭去偃陽近千里又非自會九日之所能滅國皆非也鄭元曰沐水又東南歷柎口城中柎水出於楚之柎地東南流逕傅陽縣故城東北地理志曰故偃陽國也案釋例或曰卽京相璠土地名說也

親受矢石 服注以鏑爲矢石呂覽貴直論高誘注矢

箭石磬也

傳納諸霍人 鄭元曰汾水又南逕霍城東故霍國也
師於牛首 案水經注牛首在陳畱詳桓十四年傳注
以位序聽政辟 古立位同字周禮鄭注司農古文春
秋經公卽位爲公卽立以位序聽政辟蓋以立爲大
夫之次敘而聽政令鄭國之制國有大事大夫諸司
門子皆可共議如子皮爲政每事訪於子產是也子
孔欲專政惡使諸大夫門子與聞之故違衆而有此
專命焉服虔解位序謂先爲士大夫乃至卿與下文
專欲難成意不相貫非是

闡寶

戴記儒行寶作箭徐音豆與說文同釋文引三

倉解詁曰門旁小窳也

而賜之駢旄之盟 盟皆用牛周尙駢剛是用時王之
所尙而爲盟以見尊崇之義

王叔氏不能舉其契 鄭周禮小宰注獄訟之要辭曰
契

十一年傳東侵舊許 隱八年易許田劉光伯規杜注
別有許邑邑自名許非由近許國始名爲許則此舊
許卽許田楚靈王所謂我皇祖伯父昆吾舊許是宅
者卽此

名山名川 儀禮鄭注諸侯之盟其神主山川

歌鐘二肆 周禮小胥凡縣鐘磬半爲堵全爲肆鄭注

二八十六枚而在一處謂之堵鐘一堵磬一堵謂之肆是編鐘十六枚編磬十六枚謂之肆若止編鐘十六但可謂之堵而非肆也歌鐘二肆乃六十四枚杜以十六爲肆是未考諸鄭注也

使叔肸告於諸侯 大戴禮邾後曰羊舌大夫其爲和容也溫良而好禮博聞而時出其志也盧辨注和容主賓客也璉案使叔向告諸侯正爲和容時也

以樂之半賜魏絳 周禮小胥鄭注云諸侯之卿大夫半天子之卿大夫西縣鐘東縣磬賈疏云鄭賂晉侯止有二肆當天子卿大夫判縣故取半賜魏絳是晉以判縣之半賜魏絳有金石之樂者金謂西縣鐘石

謂東縣磬也

秦庶長鮑庶長武 劉劭爵制曰秦爵十爵爲左庶長
十一爵爲右庶長十八爵爲大庶長自左庶長以上
至大庶長皆卿大夫皆軍將也所將皆庶人更卒也
故以庶更爲名大庶長卽大將軍也左右庶長卽左
右偏裨將軍也鮑武蓋左右庶長雖非大將軍之比
於秦之軍爵已爲尊貴矣

十二年傳秦庶長無地 此疑是大庶長

十三年傳伯游長 說文於旌旗之游於蹇之兒讀若
偃故荀於字伯游

十四年傳我先君惠公有不腆之田 儀禮鄭注腆善

也說文云設膳腍多也此不腆宜訓爲不多若不腆
做玉則宜訓爲不善

諸戎犄之 犄與觶通易睽六三見輿曳其牛掣釋文
鄭作挈云牛角皆踊曰挈說文作掣云角一俯一仰
子夏作舛傳云一角仰也荀作觶案諸戎觶之與
上文晉人角之正是角一俯一仰之義與牛角皆踊
曰挈同義杜訓爲犄其足與角之義不貫非是

穆子賦匏有苦葉 當從魯語共濟之說

遂誦之 周禮大司樂興道諷誦言語鄭注云以聲節
之曰誦賈疏誦則非直背文又爲吟咏以聲節之韓
非子難言篇云時稱詩書道法往古則見以爲誦

蘧伯玉 陳留風俗傳曰長樂縣有蘧伯鄉一曰新鄉
有蘧亭

而暴妾使余 詩燕燕篤先君之思以勗寡人禮記鄭
注引魯詩言獻公無禮於定姜定姜作詩言獻公當
思先君定公以孝於寡人

厚成叔 惠棟案世本惠伯革鄭氏禮記注革作鞏未
詳孰是案爾雅釋詁曰鞏篤擊固也篤擊厚也是鞏
爲堅厚之義故惠伯鞏字厚其後遂以厚爲氏世本
作革非也

以邾寄衛侯 禮記諸侯不臣寓公鄭注寓寄也齊以
邾寄衛侯是以寓公之禮待衛獻公

或輓之或推之 史記劉敬傳脫輓輅索隱曰輓者牽也輅者鹿車前橫木二人前輓一人後推之

范宣子假羽毛於齊 齊羽旄或王朝所賜如衛結茷旄旌之類

謂子庚必城郢 劉昭云江陵縣北十餘里有紀南城楚王所都南有郢城子囊所城

十四年傳公子追舒爲箴尹 呂覽高誘注楚有箴尹之官諫臣也

十五年傳武子寘諸卜 郡國志魯國卞縣

十六年傳羊舌肸爲傅張君臣爲中軍司馬 大戴禮

祁奚曰羊舌職爲公車尉也信而好直其功也至於

其爲和容也溫良而好禮博聞而時出其志也是羊舌肸兼軍尉和容二職軍尉蓋繼張老而爲中軍尉也至爲太傅則以軍尉職與張老之子爲之而和容之職盧辨注爲主賓客之事肸爲太傅猶必兼之故襄廿六年秦鍼如晉猶召行人子員是爲太傅兼和容之證此說聞自吾舅姚姬傳先生而暢言之

祁奚 祁奚疑是祁午祁奚已於襄七年請老矣無復爲公族大夫之事

脩官 官疑是助祭之官

元案上言改服爾雅釋詁服事也祭統若纂乃考服脩官

卽論語脩廢官也晉語悼公朝於武宮定百事立百官謂往諱改其舊時之非者今平公卽位又改服脩官所謂改父之臣父之政也與烝於曲沃文不相蒙

以寡君之未禘祀 周禮聖人廟用修鄭注謂始禘時
自饋食始賈疏云禘謂練祭後遷廟時以其宗廟之
祭從自始死以來無祭今爲遷廟以新死者木主入
廟特爲此祭故云始禘璉案此禘祭雖同於吉祭而
其祭獻之禮則稍減故鄭注自饋食始

十七年傳飲馬於重邱 爾疋釋邱再成爲陶邱郭注
今濟陰定陶城中有陶邱成猶重也是陶邱爲再重
之邱春秋時漢濟陰郡皆曹地此重邱疑卽陶邱以
再成釋之甚確

高厚圍臧紇於防 杜預會於防注蓋縣東南有防城
使夙沙衛唁之 服虔左傳注弔生曰唁

邑中之黔 酈元曰華元居於稷里

唯卿爲大夫 戴記雜記大夫之適子服大夫之服大夫之庶子爲大夫則爲其父母服大夫服其位與未爲大夫者齒案大夫適子卽卿也平仲疑非晏桓子適子故言唯卿爲大夫蓋大夫適子爲卿者始可服大夫之服平仲大夫庶子雖可服大夫之服而其位猶與未爲大夫者齒故降而服士服耳鄭康成說甚善王肅聖證論不足據

塹防門而守之廣里 元和郡縣志平陰故城在平陰縣東北三十里故長城首起縣北廿九里案長城卽齊侯所守之防門至齊湣王始築長城蘇代所謂齊

有長城巨防足以爲塞卽此廣里卽光里白虎通瑞
贊篇璜者橫也璜之爲言光也尙書光被四表後漢
書作橫被四表班固西都賦作橫被六合可爲廣光
音相同之證京相璠曰齊人言廣音與光同續漢志
濟北國有光里言由防門至光里皆平陰城之所徑
繞也故京相璠曰防門去平陰三里

巫山 御覽齊地記巫山一名孝堂山在平陰縣

以中軍克京茲 郡國志濟北平陰有景茲山

以上軍圍盧 郡國志濟北盧縣

將走郵棠 郡國志北海卽墨有棠鄉

右師城上棘遂涉潁 酈元曰潁水又逕上棘城西又

屈逕其城南

次於旃然 酈元以索水爲旃然水王引之曰疾言爲
旃徐言之爲成然成然之合爲旃猶終葵之合爲椎
也璉案楚人蔓成然鬪成然皆楚人方言此旃然亦
鄭地近楚之方言也故以名水

役徒幾盡 公羊傳子重曰斲役扈養死者數百人何
休注艾草爲防者曰斲汲水漿者曰役養馬者曰扈

炊烹者曰養役徒蓋卽斲役扈養之徒也

元案周禮
鄉師大軍

旅會同正治其徒役賈疏謂六軍
之外別有民徒使役皆出於鄉

吾驟歌北風又歌南風 周禮大師大師執同律以聽
軍聲而詔吉凶鄭注兵書曰大師吹律合音商則戰

勝軍士強角則軍擾多變失士心宮則軍和士卒同心徵則將急數怒軍士勞羽則兵弱少威明案鄭司農引左傳此語爲證賈疏云南方火火主燦怒故將急數怒北方水水主柔弱又主幽闇故兵弱少威明師曠蓋吹羽徵二音而知南北之強弱矣服虔注北風夾鍾無射以北南風姑洗南呂以南引之者證吹律知吉凶之事也左傳正義引服注以爲卯酉以北律呂爲北風以南爲南風保章氏以十有二風察天地之和鄭注十有二辰皆有風吹其律以知和否其道亡矣

十九年傳自澗水歸之於我 正義駁公羊傳非是說

文云灑水在魯言魯分邾田以灑水爲竟

崔杼微逆光 說文微隱行也服注爲隱匿疑非

廿一年經邾庶其以漆閭邱來奔 鄆元曰洙水又西南逕南平陽縣之顯閭亭西史記正義云南平陽縣城今兗州鄆縣在兗州東南六十二里案郡國志山陽南平陽有閭邱亭鄆元與元凱皆誤以顯閭亭爲閭邱亭可以續漢志證之

傳以公姑姊妻之 諸侯一娶九女媵以姪娣有左娣右娣詩所謂問我諸姪遂及伯姊蓋以諸姑備九女之數而以伯姊爲姪娣也魯以諸侯之禮待邾庶其故以公之姑爲正配而以公之姊爲姪娣也劉光伯

以姑姊爲襄公父之姊止一人

子爲司寇 據服注武仲蓋爲小司寇

董叔 案晉語董叔亦范宣子之壻故黨於欒氏

將歸死於尉氏 酈元因鄭治獄官有尉氏遂解此爲
將死於鄭之尉氏晉臣有罪何以歸死於鄭漢志應
劭注云古獄官曰尉氏是自古獄官皆曰尉氏非獨
鄭有之盈是時已過周之王城而至西鄙矣故言將
歸死於周之獄吏也

使候出諸輶轅 臣瓚漢書志輶轅險道名

廿二年傳殷以少牢 案殷祭卽謂練祥卒哭成事祔
祭也盛禮曰殷練祥諸祭親喪大事故亦曰殷禮記

雜記上大夫之虞也少牢卒哭成事祔皆太牢子張
卿也則其卒哭成事練祥諸祭宜用太牢今從儉易
以少牢正義第謂禘祫爲殷祭義猶未備

廿三年傳及其士 懷子好勇士如督戎是也

及七輿大夫與之 服注下軍輿帥大夫案輿帥卽夏
官輿司馬

著於丹書 周禮秋官司約小約劑書於丹書鄭注春
秋傳曰斐豹隸也著於丹書今俗語有鐵券丹書豈
此舊典之遺言

請焚丹書 周禮司隸鄭司農注恥爲奴欲焚其籍也
賈疏引之者證隸爲奴

或以戟鈎之 考工記戟廣寸有半寸胡四之鄭注戟
今三鋒戟也戟胡橫貫之江先生慎修曰鈎欒樂斷
肘而死蓋本欲生禽之故不用刺與援而用胡以鈎
之鈎之而胡之下鋒貫肘曳之而肘遂斷也

先驅至大殿 此齊莊所立軍政名服引司馬法可證

趙勝帥東陽之師以追之 馬季長曰晉自朝歌以北
至中山爲東陽服虔以東陽爲魯邑不如杜注之確
正義糾之甚當

以公鉏爲馬正 周禮夏官家司馬亦如之鄭注大夫
家臣爲司馬者春秋傳曰叔孫氏之司馬驪戾賈疏
卿大夫之采地王不特置司馬各使其家臣爲司馬

主其地之軍賦杜解馬正家司馬是公鉏主季氏地之軍賦爲家臣中之尊貴者

慍而不出 鄭論語注慍怨也

孺子秩 洛誥孺子其朋鄭注孺子幼少之稱

娶於鑄 呂覽慎大覽云武王勝殷入殷未下轡命封

黃帝之後於鑄高誘曰鑄國名淮南倣真訓冶工之

鑄器高誘注云鑄讀如唾祝之祝元案唾祝疑詛祝之譌是鑄

與祝同音汲郡古文云平王三年齊人滅祝是鑄國

已爲齊邑矣宣叔娶於鑄是娶於齊之鑄邑非國也

郡國志濟北地邱有鑄鄉城不言其爲鑄國也皇侃

論語疏以鑄爲臧賈臧爲舅氏國誤與元凱注同

臧賈 襄十七年傳賈曾帥甲三百宵犯齊師是時臧
紇已立爲大夫矣賈蓋紇出奔時適在鑄耳

多則多矣 周禮司勳云戰功曰多

廿四年傳在商爲豕韋氏 詩韋顧旣伐鄭箋韋豕韋

彭姓非劉累之後杜以商之豕韋乃劉累之後旣滅

而復封無書足證

元案漢書古今人表大彭豕韋居上下在南庚陽甲時劉姓豕韋居

中上在武丁時韋昭晉語注云商謂武丁之後初豕韋爲商伯其後商滅之劉氏自御龍代豕韋故傳曰以豕韋之後如韋此言是累在夏受氏御龍子孫至商始更豕韋昭二十九傳乃終而言之非一時事也

在周爲唐杜氏 劉光伯曰昭元年杜注云唐人若劉

累之等累遷魯縣唐在大夏居唐之人非累之裔此

注何云豕韋國於唐也又據何文知初封於唐後封

於杜賈遠國語注云武王封堯後爲唐杜二國非滅

唐封杜案杜滅唐封杜之解本竹書紀年成王八年

十月王師滅唐遷其民於杜而誤紀年但言遷唐之

民於杜亦未言封唐之後於杜也當以賈遠國語注

爲據光伯規之善矣

元案呂氏慎大覽武王封帝堯之後於黎樂記武王封帝堯之

後於祝無封唐杜之文昭元年傳唐人是因以服事夏商是夏商之時卽有唐國不待武王始封也

宛射犬 酈元曰潁水又東南逕宛亭西鄭大夫宛射

犬之故邑潁水又南逕射犬城東卽鄭公孫射犬城

兄弟也 儀禮喪服傳鄭注云兄弟猶言族親也

有庸 夏官司勳民功曰庸賈疏云庸亦功也

廿五年傳度山林

至

井衍沃

周禮賈疏云是楚之地

美惡有九等

規偃豬

周禮稻人以豬畜水以防止水鄭注豬畜流

水之陂也防豬旁堤也

元案周禮宮人爲其井區鄭注區豬謂雷下之池受畜水

而流之者疏後鄭以區字與規區豬同蓋積水滂潦之地故鄭以雷下池當之

廿六年傳先八邑

古者君賜臣邑皆一乘之邑劉光

伯說甚善杜以四井爲邑爲解晉取衛西鄙懿氏邑

六十以與孫氏服虔以爲六十邑卽一乘之邑杜解

爲六十井尤謬劉君規之是也能安生禮記疏云卿

備百邑者鄭志以爲邑方二里案百乘之家卽卿備

百邑之證鄭賜子展以八邑杜何所據而知其非一

乘之邑邪服虔先六邑注亦爲四井爲邑之邑杜注
蓋本此也

及雩婁 晉書地道記曰雩婁在安豐縣之西南

多鼓軍聲以夜軍之 淮南兵畧訓曰夜則多火晦冥
多鼓此善爲設施者也

雍害其事 十二年傳道路無雍唐石經作雍是雍古
文雍字此雍害其事卽雍害其事故釋文音於勇反
廿七年傳削而投之 顏氏家訓云古者書誤則削之
考工築氏爲削鄭注今之書刀

以喪莊公 通典引王肅喪服要記注云老疾三諫去
者爲舊君服齊衰鮮虞蓋爲莊公服齊衰之服合於

舊君反服之制

廿八年傳跋涉山川 高誘曰不從蹊遂曰跋涉

盧蒲嬖

呂覽作盧滿嬖滿滿古字通

元案晉厲公州蒲釋文作州滿

得慶氏之木百車於莊

爾疋釋宮六達謂之莊郭注

引此傳初學記引孫炎注云莊盛也孟子引而置之

莊嶽之閒數年趙岐注云莊嶽齊街里名也蓋因爾

疋以爲城中街道之名釋名本爾疋六達爲莊解云

莊喪也喪其上使高也杜以六達爲六軌遂解莊爲

六軌之道正義附會之以九達竝九軌故亦以莊爲

六軌不知爾疋六達言其交道六出竝無六軌九軌

之訓劉光伯規之甚當孔仲達曲爲杜解非也李巡

注爾疋亦取竝軌之義其誤與杜同

慶封汜祭 公食大夫禮云祭食之禮各有其處汜祭則於所祭之處太遠

如布帛之有幅焉 儀禮鄭注今官布幅廣二尺二寸漢食貨志云布帛廣二尺二寸爲幅方言緇廣爲充說文云畱滿也

廿九年傳公與公冶冕服 周禮弁師鄭注云冕則三命之卿纁三就用玉十八再命之大夫藻再就用玉八一命之大夫冕而無旒公治本一命大夫冕而無旒今賜以再命之服冕而有旒又弁師掌王之五冕皆元冕賈疏云古者績麻三十升布染之上以元下

以朱以其上以元故統謂之元冕

射者三耦公臣不足取於家臣 儀禮鄉射禮鄭注云

司射選弟子之中德行道藝之高者以爲三耦魯國
是時賢臣皆仕於三家故公臣不能具三耦

武獻以下兼國多矣 韓非子說難篇行人燭對趙簡

子曰昔者吾先君獻公并國十七服國卅八

自郟以下 水經注引劉楨毛詩義問云郟在豫州外

方之北北鄰於虢補傳引王注云周武王封祝融之

後於濟洛河穎之閒爲檜子 元案鄭語妘姓郟郟路
備陽韋注陸終第四子

曰求言爲妘
姓封於郟

通嗣君也 賈服皆以嗣君爲夷末新卽位使來通聘

以上文餘祭被弑而夷末立證之可見杜謂餘祭使
來通聘正義又曲爲疏證非是

終身不聽琴瑟 詩山樞何不日鼓瑟何休公羊解詁
引魯詩傳曰天子食日舉樂諸侯不釋縣大夫士日
琴瑟文子蓋終身不聽樂矣

卅年傳而廢其輿尉 夏官輿司馬鄭注輿衆也服虔
以輿衛爲軍尉主發衆使民淮南兵畧訓尉之官論
除謹高誘注云論賢除吏謹慎也老人賢而不能舉
故廢之正義以爲中軍尉蓋以其爲趙武之屬大夫
武時將中軍故以爲中軍尉

伯有死於羊肆 羊肆蓋鄭城外里名

斗城 鄭元曰沙水又東南逕斗城西沙水又東南逕牛首亭東是斗城與牛首近皆在陳畱爲鄭之東郊田有封洫 周禮大司徒正其畿疆而封溝之鄭注封起土界也四邱爲甸賈疏云甸方八里旁加一里則爲十里之成今不言十里成而言八里甸者成閒有洫洫閒有溝旁加一里使治溝洫子產旣正其田之疆之封界而每甸八里必旁加一里爲成使治溝洫則豪強不敢肆兼併之謀農畝亦永無旱潦之患故輿人終懷其惠而歌誦之也

我有田疇 韋昭國語注云穀地爲田麻地爲疇漢書注云美田爲疇一切經音義引倉頡篇曰疇耕地也

趙岐孟子注疇一井也

取我衣冠而褚之 呂覽悔過篇褚作貯一切經音義

引傳亦作貯周禮屋人鄭注褚藏也釋文云本或作貯或作褚是褚貯通

卅一年傳齊出也 儀禮喪服傳鄭注姊妹之子爲出

延州來 陸廣徵吳地記毗陵本名延陵吳子諸樊封

季札漢改毗陵

御覽

春秋左傳補注卷二